



27. januar 2015

UPA 2015/138

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

Kommunet sisamaasut akornanni Nunaqarfinni Aqutsisut akisussaaffiinik pisinnaatitaaneqarnerannillu assigiiaarnerusumik atorpeqartussaatinnaat qanoq anguniarneqarsinnaanersoq pillugu oqallisissiatut siunnersuut.

(Inatsisartunut ilaasortat Sara Olsvig aammalu Ane Hansen, Inuit Ataqatigiit)

Kommunet sisamaasut akornanni assigiinngiiartumik Nunaqarfinni Aqutsisut nunaqarfinnilu aqutsisutut qinigaasimasut akisussaaffiinik piginnaatitsinerillu Inatsisartut inatsisaat nr. 22, 18. november 2010-meersoq, kapitali 6 tunngavigalugu aalajangiiffiqartartunik atuutsitsipput.

§51 imm. 3-imi aalajangersaavigineqarpoq Nunaqarfinni Aqutsisut susassaarfii aalajangersorneqartarput kommunalbestyrelsemit pisinnaatitsinikkut. Taassuma aalajangersakkami kommunalbestyrelsep qanoq annertutigisumik nunaqarfinnut qanoq annertutigisumik oqartussaatisssanerlutik nunaqarfinnut pissutsinut tunngasunik.

§53 imm. 2-mi aalajangersarneqarpoq kommunalbestyrelse pisussaasoq nunaqarfik pineqartumu tunngasunik suliaqarnerminni Nunaqarfinni Aqutsisut tusarniaqqaartassagaat, nunaqarfiup oqartussaaffigilersimanngisaanik.

Kiisalu §53 imm. 1-imi aalajangersarneqarpoq nunaqarfinni Aqutsisut (namminneq piumasusertik atorlugu) Kommunalborgbestyrelsemut inassuteqarsinnaallutik nunaqarfinni pissutsit pillugit.

Nunaqarfinni Aqutsisut pisinnaatitaaffiinik akisussaaffiinillu assigiinnerusumik nassuiaateqarnissaq atuutitsilersitsinissarlu naleqqunnerussagaluartoq Inuit Ataqatigiinnit isumaqarpugut, Kommunet namminersorsinnaatitaanerit soorunami ataqqillugu. Taama ilinikkut Nunaqarfinni Aqutsisunit qinersinermi suna siunertaralugu qinersisoqarnerisooq ulluinnarnilu Nunaqarfinni Aqutsisut qanoq piginnaatitaaffeqarnerisut Nunaqarfinni Aqutsisunit qinigaasunut innuttaasunullu paasiuminarnerussagaluarpoq.

Inuit Ataqatigiinnit isumaqarpugut Nunaqarfinni Aqutsisut oqartussaaqataanerit anner-tussasoq, aalajangiussassat Nunaqarfinni Aqutsisunit aalajangiunneqarsinnaasut taak-kunannga aalajangiunneqartarnissaat kissaatigaarput, qanimut oqartussaaqataaneq siammasissumillu aalajangeeqataasinnaaneq angujumallugu.

Inuit Ataqatigiinnit maluginiarparput kommuneni assigiinngittunik aqqiissuteqartoqarsi-masoq. Assersuutigalugu pissutsit ima paasivagut Kommuneqarfik Sermersuumi Nuna-qarfinni Aqutsisunik akuutitsineq Qaasuitsup Kommuneanimit annertunerisooq. Qaasuitsup Kommuneani Kangaatsiap eqqaani aasaq manna angalanitsinni

assersuutigalugu ilisimatinneqarpugut Nunaqarfinni Aqutsisut ataatsimiinnerannit imaqarniliat tamanik atuarneqarsinnaanngorlugit saqqummiunneqarneq ajormata kommunalbestyrelsellu suliaannut tamakkiisumik ilanngunneqartarnatik.

Inuit Ataqtigiinnit isumaqarpugut Nunaqarfinni Aqutsisunik annertunerusumik akuutitsineq pisinnaatitaaffeqarnerlu kommuneni tamat oqartussaaqataanerannik ingerlatsinermik pitsanngorsaassasoq nunaqarfinnilu innuttaasunut qanimut oqartussaaqataanerulersitsissasoq.

Oqallinnissaq qilanaaraarput Inatsisartunilu partiinit ajunngitsunik kinguneqartussanillu isummersortoqarumaartoq kissaatigalugu.